



MUKADIMAH

YANG BERTHORMAT

**PEHIN DATU LAILARAJA MEJAR JENERAL (B) DATO PADUKA SERI
HAJI AWANG HALBI BIN HAJI MOHD. YUSSOF,
MENTERI PERTAHANAN KEDUA**

**SESI MAJLIS MESYUARAT NEGARA KE 15
[PERUNTUKAN KEWANGAN MINDEF 2019/2020]**

HARI : SELASA

05 REJAB 1440 / 12 MAC 2019

TEMPAT :

JABATAN MAJLIS-MAJLIS MESYUARAT

السلام عليكم ورحمة الله وبركاته

Dan Salam Sejahtera

بِسْمِ اللَّهِ الرَّحْمَنِ الرَّحِيمِ
الْحَمْدُ لِلَّهِ رَبِّ الْعَالَمِينَ ، وَالصَّلَاةُ وَسَلَامٌ عَلَى أَشْرَفِ الْأَنْبِيَاءِ وَالْمُرْسَلِينَ
سَيِّدِنَا مُحَمَّدٍ وَعَلَى آلِهِ وَصَحْبِهِ أَجْمَعِينَ

Yang Berhormat Yang Di-Pertua;

dan Ahli-Ahli Yang Berhormat yang dirahmati Allah dan peramba/kaola/saya hormati,

1. Alhamdulillah, kita bersyukur ke hadrat Allah Subhanahu wa Ta'ala kerana dengan izin dan rahmatNya jua kita dapat sekali lagi berkumpul di Mesyuarat yang diberkati di dewan yang mulia ini, untuk sama-sama membincangkan mengenai isu-isu kepentingan negara yang kita sama-sama cintai ini.
2. Di awal kesempatan ini, peramba/kaola/saya bagi pihak Kementerian Pertahanan dan Angkatan Bersenjata Diraja Brunei dengan penuh hormat dan takzim sukacita menyembahkan ucapan setinggi-tinggi menjunjung kasih Kehadapan Majlis Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam di atas kurnia cadangan peruntukan bagi Tahun Kewangan 2019/2020.

3. Cadangan peruntukan untuk Kementerian Pertahanan dan Angkatan Bersenjata Diraja Brunei bagi Tahun Kewangan 2019/2020 ialah sebanyak lima ratus lapan puluh sembilan juta, lapan ratus tujuh puluh ribu dan empat ratus lima puluh ringgit). Jumlah ini merupakan peningkatan sebanyak tiga puluh lima juta, enam ratus lima belas ribu dan tujuh ratus lima puluh ringgit), atau lebih kurang 6% daripada peruntukan yang telah diluluskan pada Tahun Kewangan yang lalu.
4. Dalam memikul amanah yang telah dipertanggungjawabkan ke atasnya, Kementerian Pertahanan dengan menjunjung sepenuhnya titah Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam mengenai kepentingan pendekatan *'Whole-of-Nation'* dan *'Whole-of-Government'*, terus komited untuk memastikan sumbangan maksima pertahanan dan usaha-usaha memperkasakan kapasiti negara serta rakyat dalam sama-sama menyumbang bagi memastikan kestabilan, keamanan dan kesejahteraan negara yang kita nikmati selama ini akan terus berkekalan lagi berpanjangan.
5. Sumbangan utama Kementerian Pertahanan adalah melalui peranannya di dalam Strategi Keselamatan Kebangsaan iaitu mempertahankan kedaulatan dan kestabilan untuk menjadi salah sebuah negara yang paling selamat di dunia, seterusnya mencapai

matlamat Wawasan Brunei 2035 bagi kehidupan yang berkualiti dan rakyat yang berpendidikan tinggi serta ekonomi yang dinamik dan mampan.

6. Sejalan dengan peranan ini, misi Kementerian Pertahanan adalah **Mempertahankan Kedaulatan, Keutuhan Wilayah dan Mendokong Perlembagaan dan Falsafah Melayu Islam Beraja.**
7. Kearah pelaksanaan misinya dengan efektif, melalui perancangan strategik yang komprehensif, strategi-strategi pertahanan telah dibentuk dan dilaksanakan. Strategi-strategi pertahanan ini secara berterusan dinilai semula dan dikemaskini bagi memberikan pilihan respon yang lebih teratur kepada cabaran-cabaran yang disesuaikan dengan perubahan-perubahan lanskap serta tren di persekitaran strategik, domestik, serantau dan sejagat, yang disejajarkan dengan strategi-strategi pembangunan peringkat nasional.

8. Secara berterusan, fokus strategi pertahanan adalah ke arah memastikan dan menyumbang kepada pertahanan holistik yang tidak lari daripada tujuh **Key Result Areas** yang diuraikan dalam Mukadimah Pembentangan Kementerian ini semasa Musim Permesyuaratan Majlis Mesyuarat Negara ke-14 pada tahun 2018 yang disingkatkan dengan akronim **IKWONDAMAI** yang membawakan erti:

I - Integriti Wilayah Yang Kukuh;

K - Tahap Keupayaan Tempur dan Kesiagaan yang Tinggi;

WON - Mendokong Pendekatan '**Whole-of-Nation**';

D - untuk **Diplomasi** Pertahanan yang Efektif;

A - Penglibatan Ketenteraan dalam Misi-Misi **Antarabangsa**;

MA - Sumber Tenaga **Manusia** yang Berkualiti Tinggi; dan

I - yang tidak kurang pentingnya, **Imej** Pertahanan yang Berwibawa dan Kredibel.

Semua ini adalah **Stakeholder Values** yang meliputi dimensi-dimensi berikut:

Pertama	:	Keutuhan Kedaulatan Negara
Kedua	:	Integriti Wilayah yang Kukuh
Ketiga	:	Ketenteraman Awam
Keempat	:	Kekukuhan Perpaduan Rakyat
Kelima	:	Pembangunan Sosioekonomi yang positif
Keenam	:	Kestabilan dan Keamanan Persekitaran Serantau dan Antarabangsa.

Menyedari hakikat Angkatan Bersenjata Diraja Brunei kini diambang usia bertambah matang iaitu 58 tahun pada 31 Mei 2019 ini, dan keadaan persekitaran strategik negara telah banyak berubah hasil dari kepesatan pembangunan sebagai contoh kepesatan pembangunan di Pekan Muara, Pulau Muara Besar dan Teluk Brunei dengan terbinanya Jambatan Penghubung Daerah Brunei/Muara dan Daerah Temburong sudah tiba masanya bagi Kertas Putih Pertahanan dikemaskinikan yang akan menghendaki antarlain perubahan konsep-konsep operasi dan perolehan peralatan serta persenjataan baharu dengan memberikan tumpuan kepada pembangunan keupayaan yang lebih seimbang dan holistik, menggantikan peralatan yang berusia akan dikira *obsolete*. Antara perolehan ini insha Allah diusahakan dan akan

direalisasikan menjelang usia signifikan Angkatan Bersenjata Diraja Brunei genap mencapai 60 tahun di tahun 2021 nanti.

9. Oleh itu, tiga teras utama strategi pertahanan yang sentiasa relevan adalah, Keupayaan Cegah Rintang (*Deterrence*) dan Respon; Diplomasi Pertahanan; dan Pertahanan Holistik.

a. Teras Utama Pertama, Keupayaan. Ini dicapai dengan mewujudkan angkatan bersenjata yang kredibel dari segi kapasiti dan kemampuan, dengan tahap kesediaan dan siap-siaga yang tinggi, responsif dan *adaptable*. Program-program di bawah teras ini termasuk:-

- i. Menyelenggara dan Meningkatkan-upaya aset dan prasarana dokongan yang sedia ada;
- ii. Memperoleh peralatan dan aset bagi mengurangkan jurang keupayaan (*capability gaps*) yang tertunggak mahupun juga keupayaan berbangkit untuk memenuhi keperluan tugas semasa dengan mengambilkira perkembangan teknologi yang terkini di dalam *capability planning*;
- iii. Melaksanakan pengambilan (*recruitment*);
- iv. Membangun dan Memperkembangkan kepakaran dan profesionalisme kearah kualiti perkhidmatan pertahanan

yang tinggi. Ini turut termasuk pelaksanaan secara tempatan sebelumnya diperoleh di luar negara;

- v. Menjaga kebajikan menyeluruh anggota tentera;
- vi. Melaksanakan latihan-latihan kesiagaan;
- vii. Memperoleh kepakaran khas beserta keupayaan peralatan berkaitan dalam menangani risiko-risiko keselamatan kontemporari dan yang berbangkit;
- viii. Memantapkan perintah dan kawalan; dan
- ix. Meronda dan Mengawasi kawasan perbatasan darat, maritim dan udara.

b. **Pencapaian**: Sehingga kini, program-program yang dilaksanakan di bawah teras ini – contohnya perolehan kapal-kapal peronda Kelas DARUSSALAM dan kapal-kapal peronda laju Kelas IJTihad serta pesawat helikopter pelbagai peranan; penaiktarafan fasiliti Institut Latihan ABDB; penubuhan Markas Angkatan Bersama, Akademi Pertahanan dan Pusat Latihan Tentera Laut; penambahbaikan Markas Tentera Laut Diraja Brunei; penubuhan Markas Khidmat Bantuan Kombat; Tentera Darat Diraja Brunei; pembangunan *Medical Reception Station (MRS)* dan *single soldiers accommodation* – antarlain telah

menyumbang secara signifikan kepada peningkatan tahap kesediaan dan siap-siaga anggota, aset dan prasarana tentera yang dimanifestasikan dalam bentuk tahap *operational readiness* yang meningkat dan masa bertindak (*response time*) yang semakin pantas dari tahun ke tahun.

c. Hasil pencapaian ini akan terus dioptimalkan bagi memastikan sumber daya pertahanan sentiasa dalam keadaan bersedia dan boleh diaturgerak seterusnya dikerah pada bila-bila masa, bukan sahaja untuk menangani konflik konvensional tetapi juga untuk melaksanakan tugas-tugas lain seperti operasi Mencari dan Menyelamat (*Search and Rescue - SAR*) dan Bantuan Bencana dan Kemanusiaan (*Humanitarian Assistance and Disaster Relief - HADR*). Begitu juga bagi memantapkan kemampuan respon dan penglibatan dalam misi-misi luar negara yang menyumbang kepada kestabilan dan keamanan sejagat, termasuk misi pemantau, operasi pengamanan dan operasi HADR.

d. Alhamdulillah, dengan tahap kesediaan dan kesiapsiagaan yang sentiasa dijaga, Angkatan Bersenjata Diraja Brunei telah berjaya mengikuti operasi-operasi sedemikian di Cambodia (*United Nations Transitional Authority in Cambodia, UNTAC*, pada tahun 1992 - 1993); Pada tahun 2005 pula memberikan bantuan operasi HADR selepas Indian Ocean Tsunami di Aceh dan gempa

bumi di Jogjakarta, Indonesia. Dan pada tahun yang sama menjadi ahli misi pemantau *Aceh Monitoring Mission*; Misi penghantaran bantuan kemanusiaan ke Tacloban, Filipina selepas taufan Haiyan pada tahun 2013; dan memberikan bantuan kemanusiaan kepada mangsa gempa bumi di Nepal pada tahun 2015.

e. **Perancangan** : Peruntukan pertahanan tahun kewangan ini dan jangka waktu dekat mendatang antarlain akan disalurkan bagi Pembinaan dan Peningkatan Taraf Prasarana-Prasarana unit baharu dan unit latihan serta Perumahan Anggota.

Yang Berhormat Yang Di-Pertua;

dan Ahli-Ahli Yang Berhormat yang dirahmati Allah dan peramba/kaola/saya hormati,

a. Teras Utama Kedua, **Diplomasi Pertahanan**. Ini dicapai dengan melaksanakan serta bergiat aktif dalam menjalinkan hubungan pertahanan dengan negara-negara sahabat, baik dua-hala, mahupun pelbagai hala, sejajar dengan dasar luar negara, ke arah:

i. Peningkatan kefahaman, keyakinan, ketelusan dan keterbukaan seterusnya mewujudkan rasa saling-percaya (*mutual trust*) dan saling hormat-menghormati (*mutual*

respect) sesama pihak didalam saling bekerjasama (*mutual cooperation*).

- ii. Menjamin sokongan negara-negara sahabat, baik dari bentuk bantuan pembangunan kapasiti mahupun juga sokongan secara perinsip dalam apa jua agenda dan inisiatif yang diterajui negara di arena serantau dan antarabangsa.
- b. Program-program di bawah teras ini termasuk pelaksanaan :
- i. Penandatanganan Memorandum Persefahaman (MoUs) dan Perjanjian di bidang Kerjasama Pertahanan;
 - ii. Menubuhkan dan Mengekalkan pejabat-pejabat Perwakilan Pertahanan – Penasihat Atase Pertahanan – di Suruhanjaya Tinggi-Suruhanjaya Tinggi dan Kedutaan-Kedutaan Besar Negara Brunei Darussalam di luar negara.
 - iii. Pengungkayahan dan Penyertaan dalam latihan ketenteraan dua-hala dan pelbagai-hala termasuk yang di bawah payung keahlian dalam pertubuhan-pertubuhan serantau dan antarabangsa, khususnya ASEAN;
 - iv. Pertukaran dan Perkongsian maklumat, termasuk maklumat perisikan;

- v. Pertukaran latihan dan pendidikan tentera dan pertahanan.
 - vi. Pengungkayahan dan Penyertaan dalam lain-lain interaksi pertahanan dan ketenteraan termasuk pertukaran lawatan, jemputan dan kehadiran dalam pelbagai inisiatif pembangunan keyakinan dan usahasama keselamatan dua-hala dan pelbagai-hala.
- c. **Pencapaian:** Tahun demi tahun, interaksi pertahanan dan ketenteraan di bawah *platform* dua-hala dan pelbagai-hala terus meningkat dari segi jumlah dan skop kerjasama yang hingga setakat ini telah merangkumi bersama lebih 60 negara dari seluruh pelusuk dunia. Memorandum-Memorandum Persefahaman (*MoUs*) dan Perjanjian Pertahanan telah dimeterai dengan 18 buah negara sebagai manifestasi bagi pengiktirafan yang diberikan kepada kredibiliti organisasi pertahanan negara sebagai rakan-kongsi yang strategik.
- d. Walaupun Proses Damai di Selatan Filipina memperoleh kemajuan yang ketara, ABDB juga terus mendapat kepercayaan sebagai penyumbang dalam Pasukan Pemantau Antarabangsa / *International Monitoring Team* [IMT] di Mindanao, Selatan Filipina yang memasuki tahun ke 15 penglibatan pada tahun ini. Kepercayaan ini jelas terpancar melalui peranan terkini yang dipertanggungjawabkan melalui *Independent Decommissioning*

Body [IDB], dalam usaha bersama untuk merealisasikan fasa proses damai yang seterusnya di Mindanao berikutan penandatanganan *The Framework Agreement on the Bangsamoro*. Begitu juga penyertaan dalam *United Nations Interim Force in Lebanon* [UNIFIL] yang mana telah genap sepuluh tahun penglibatan pada tahun 2018.

e. Manifestasi pengiktirafan signifikan yang lain termasuk juga penempatan Pegawai Angkatan Bersenjata Diraja Brunei sebagai *International Liaison Officer (ILO)* di *International Fusion Centre (IFC)* dan *Regional HADR Coordination Centre (RHCC)* di Singapura bermula tahun 2013 dan 2015; dan *Command Watch Captain di Combined Task Force 151 (CFC151), Gulf of Aden* sejak 2010. Pada tahun 2014, dua buah Kapal Tentera Laut Diraja Brunei, KDB DARUSSALAM dan KDB DARULAMAN membuat pelayaran ke Hawaii, Amerika Syarikat buat kali pertama menyertai Eksesais Maritim Antarabangsa terbesar di dunia, *Rim of the Pacific Exercise (RIMPAC)*. Pada tahun lepas (2018) Tentera Laut Diraja Brunei, juga buat kali pertama, telah menyertai *ASEAN-China Maritime Exercise (ACMX)* di Republik Rakyat China dan *International Fleet Review 2018 (IFR ROK)* di Republik Korea.

f. Melalui rangka kerja kerjasama Mesyuarat Menteri-Menteri Pertahanan ASEAN (ADMM), Kementerian Pertahanan juga membuktikan kemampuan untuk memikul dan melaksanakan

dengan jayanya peranan sebagai pengerusi-bersama bagi *ADMM-Plus Experts' Working Group (EWG) on Maritime Security (2014-2017)*; hos kepada dua latihan besar iaitu *ADMM-Plus HADR/Military Medicine Exercise (2013)* dan *ADMM-Plus Maritime Security/Counter-Terrorism Exercise (2016)*. Di samping itu, inisiatif negara bagi penubuhan *Direct Communications Link* antara Menteri-Menteri Pertahanan ASEAN juga mendapat sokongan dan dilaksanakan secara berfasa yang mana sekarang dikenali sebagai *ASEAN Direct Communications Infrastructure (A.D.I)*.

g. **Perancangan** : Peruntukan pertahanan tahun kewangan ini dan jangka waktu dekat mendatang antarlain akan disalurkan bagi:

i. Mengekalkan penglibatan aktif dalam aktiviti-aktiviti kerjasama di bawah rangka kerja ASEAN, ADMM dan ADMM-Plus. Ini termasuk penyertaan dalam latihan-latihan anjuran *ADMM-Plus Experts' Working Groups (EWGs)* yang merangkumi *HADR, Maritime Security, Military Medicine, Counter-Terrorism, Humanitarian Mine Action, Peacekeeping Operations* dan *Cybersecurity*. Pada putaran 2020 – 2023, Kementerian Pertahanan akan menjadi pengerusi bersama *Military Medicine* bersama Australia. Hal ini akan melihat Kementerian ini menerajui usaha-usaha peningkatan

kerjasama praktikal dalam bidang ini diantara negara-negara ASEAN dan juga negara-negara rakan dialog yang lain.

- ii. Melaksanakan dan menyertai aktiviti-aktiviti di bawah peruntukan *MoUs*, Perjanjian dan kesepakatan dua-hala di bidang kerjasama pertahanan. Ini termasuk Mesyuarat-Mesyuarat *Joint Defence Working Committee*, Latihan-Latihan Tentera, Mesyuarat-Mesyuarat Pertukaran Perisikan, Pertukaran Lawatan Anggota, Lawatan-Lawatan Kapal, Pertukaran Latihan dan Pendidikan dan sebagainya. Tahun ini Tentera Udara Diraja Brunei (TUDB) akan menjadi hos bagi Mesyuarat *16th ASEAN Air Chiefs Conference (AACC)* dan *6th ASEAN Air Force Education & Training Working Group Meeting (AAFET)*. Pada tahun 2020 Angkatan Bersenjata Diraja Brunei akan menjadi Tuan Rumah *Brunei International Skill at Arms Meet (B.I.S.A.M)* iaitu Pertandingan Menembak terbesar di rantau ini. Manakala pada tahun 2020 juga tiba giliran Tentera Darat Diraja Brunei (TDDB) untuk menghoskan *ASEAN Chief of Armies Multilateral Meeting (ACAMM)*, *ASEAN Sergeant Majors Annual Meeting (ASMAM)* dan *ASEAN Armies Rifle Meet (AARM)*.
- iii. Melaksanakan inisiatif-inisiatif pembangunan kapasiti bagi angkatan-angkatan tentera sahabat termasuk pengendalian

Kursus Bahasa Inggeris, Program Perkembangan Eksekutif, Kursus Maktab Turus ABDB dan juga Kursus Pegawai Staf Rendah ABDB. Alhamdulillah, Pelaburan Modal Insan melalui Akademi Pertahanannya yang kini berusia lapan (8) tahun telah turut melahirkan seramai 140 graduan (Intake 1-9 Kursus Maktab Turus) dan seramai 459 graduan (Intake 1-17 Kursus Pegawai Kadet). Insha Allah pada pengambilan Kursus Pegawai Kadet ke-18 nanti, seramai 83 orang akan mengikuti kursus tersebut. Ini merupakan bilangan terbesar dalam satu pengambilan setakat ini. Di samping mendidik dan melatih pegawai-pegawai tempatan, Akademi Pertahanan juga turut menjayakan penyertaan 14 negara-negara sahabat di berbagai kursus utama seperti Kursus Maktab Turus dan Kursus Pegawai Staf Rendah.

a. Teras Utama Ketiga, **Pertahanan Holistik**. Ini dicapai dengan melaksanakan *Whole of Nation Approach* kepada pertahanan. Program-Program di bawah teras ini termasuklah:

- i. Penglibatan dalam Jawatankuasa Keselamatan Negara [JKN] dan jawatankuasa-jawatankuasa kerja di bawahnya dalam merangka dan melaksanakan strategi keselamatan nasional;
- ii. Melaksanakan operasi-operasi berbilang agensi;

- iii. Menghulurkan sumbangan kepakaran khusus dan keupayaan aset dalam tugas-tugas nasional. Ini termasuk *bomb disposal*, mencari dan menyelamatkan (SAR), bantuan kemanusiaan, anti-lanun, pengangkutan anggota *MEDEVAC (Medical Evacuation)* dan *CASEVAC (Casualty Evacuation)*);
- iv. Mendukung Pembangunan Nasional dan karakter Bangsa khususnya dalam pembinaan kesedaran dan pemahaman yang luas bagi kepentingan membela dan mempertahankan negara bagi setiap penduduk serta mempromosikan dan memaparkan semangat patriotisme dan cinta pada negara dan komitmen bagi pemeliharaan nilai-nilai kenegaraan. Nilai-nilai ini insha Allah akan terus diperkukuhkan termasuk melalui kegiatan-kegiatan Askar Simpanan Melayu Diraja Brunei (ASMDB), Persatuan Veteran Angkatan Bersenjata Diraja Brunei (PERWIRA) dan Pasukan-Pasukan Kadet Tentera, iaitu golongan belia negara yang masih di alam persekolahan, kegiatan dan penghasilannya yang akan diberikan sinergi bersama Kementerian Pendidikan dan Kementerian-Kementerian dan agensi berkepentingan lain.
- v. Mengekalkan imej profesionalisme dan berwibawa dalam segala aspek, bagi memberi keyakinan kepada rakyat bahawa Angkatan Bersenjata Diraja Brunei benar-benar

mampu dan terbukti berupaya melindungi kedaulatan dan kepentingan strategik negara.

- vi. Alhamdulillah, seperti juga yang dimaklumkan oleh Yang Berhormat Menteri Di Jabatan Perdana Menteri dan Menteri Kewangan dan Ekonomi Kedua, di Mukadimah YB itu penandatanganan Projek usahasama atau *Joint Venture* di antara Kerajaan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam dan Muara Maritime Services Sdn Bhd telah dimeterai pada hari Rabu, 6 Mac 2019 yang baru lalu. Projek ini akan banyak memberikan kesan positif dan kesan *spin off* masa panjang merangkumi pemeliharaan dan pembaikpulihan aset maritim negara, peluang pekerjaan kepada anak-anak tempatan dan juga usaha menubuhkan industri pertahanan disuatu hari nanti.

Yang Berhormat Yang Di-Pertua;

dan Ahli-Ahli Yang Berhormat yang dirahmati Allah dan peramba/kaola/saya hormati,

10. Sehingga kini, dengan berkat daulat kepimpinan bijaksana Kebawah Duli Yang Maha Mulia Paduka Seri Baginda Sultan Haji

Hassanal Bolkiah Mu' izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam yang juga Menteri Pertahanan dan Pemerintah Tertinggi Angkatan Bersenjata Diraja Brunei kegiatan-kegiatan pertahanan dengan teras-teras utama diujahkan tadi telah berjaya memastikan negara bebas daripada ancaman konvensional dan membolehkan rancangan-rancangan kemajuan dan pembangunan negara berjalan lancar dan berjaya. Justeru, Kementerian Pertahanan dan Angkatan Bersenjata Diraja Brunei selaku perisai dan penjamin keselamatan dan keamanan negara, yang 89.1 peratus dari kekuatan ketumbukannya adalah tergolong dalam kategori belia, iaitu 4.5 peratus dari jumlah keseluruhan belia negara ini. Sebagai maklumat tambahan, Angkatan Bersenjata Diraja Brunei terus memberikan peluang pekerjaan kepada belia dan beliawanis yang layak melalui pengambilan rekrut lelaki dua kali setahun dengan jumlah keramaian 480 orang. Sementara itu, pengambilan rekrut wanita dijalankan satu kali setahun dengan pengambilan seramai 60 orang. Sehubungan ini, Insha Allah Kementerian Pertahanan akan terus menyasarkan pelaksanaan program-program peningkatan dan penambahbaikan kapasiti kearah memperkasakan keupayaan sejajar dengan fokus-fokus pertahanan yang disebutkan.

11. Dan pada menjunjung hasrat dan titah Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam, Kementerian Pertahanan dan Angkatan Bersenjata Diraja Brunei akan terus memberikan fokus bagi memastikan semua pihak berkepentingan dilibatkan untuk menjamin perancangan mencapai kejayaan dan pertahanan negara secara menyeluruh dan mampan dicapai.
12. Kita hayati disini juga titah Baginda isu keselamatan tidak boleh dikompromikan. Justeru pertahanan Negara Brunei Darussalam negara berdaulat tercinta adalah tetap masih dan akan sentiasa menjadi tanggungjawab kita semua, termasuk kitani yang ada di dalam dewan mulia ini, dalam ertikata lain bukan hanya terletak kepada Kementerian Pertahanan, Angkatan Bersenjata Diraja Brunei dan agensi-agensi keselamatan yang lain.
13. Kita sama berdoa dengan rahmat dari Allah Subhanahu wa Ta'ala, ikrar taat setia yang tidak berbelah bahagi Kehadapan Majlis Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam dan Kerajaan Baginda, Negara Brunei Darussalam akan kekal aman makmur berdaulat di dalam pemeliharaan Allah Subhanahu wa Ta'ala dan barisan pertahanannya dengan tawakal yang jitu semangat kepahlawanan Brunei sejati juga akan tabah berani menghadapi cabaran-cabaran

serta akan terlepas dari segala musibah di dalam pengabdian tulus menunaikan amanah besar ini.

Sekian.

=====

Sekian Terima Kasih

Yang Berhormat Pehin Pengerusi

وبالله التوفيق والهداية والسلام عليكم ورحمة الله وبركاته